

## НАРАН ҮБДЭДЭГ ГҮ?

Энэ хөөрэлдөөнэй нүүлээр хэдэн хоногой үнгэрөөд байхада, Сэсэгмаа хүүгэдэй саадһаа ехэ голхоронхой гэртээ ерэбэ. Эхэнь хубсаһыень тайлаха зуураа:

– Басагамни, юундэ гомдообши? Юун болооб? – гэжэ ханаагаа зобон асууба. Сэсэгмаа нюдөө аршан, нэгэ үе соо абяагүй байһанайнгаа удаа:

– Эжы, бүхы дэлхэй дээрэ дулаа үгэдэг наран үбдэдэг гү? – гэжэ һонин асуудал гэнтэ табижархиба. Тиигээд, юун гэгшэ ааб гэхэндэл, эхынгээ нюдые алдангүй гэтэжэ, амилхаяа болишоод байба.

– Бүхы дэлхэй дээрэ бүхы хүн амитанда дулаа үгэдэг наран хэзээдэшье үбдэдэггүй мүнхэ зула гээшэ,– гэжэ эхынгээ хэлэмсээр, Сэсэгмаагай уһатаһан нюдэд баярай ошоор ялалзаба.

– Мүнөөдэр минии хажууда һууһан хүбүүн нарые үбдэнхэйгээр зураа. Би нарые хэзээдэшье үбдэнхэйгээр зурахагүйб. Наран бүхы зондо дулаа үгэдэг, үшөө хонхо сэсэгүүдые ургуулдаг ха юм,– гээ һэн.